



07 APR, 2025

'Tunggu pihak atasan untuk tahu tempat tinggal'

Berita Harian, Malaysia



Letupan paip gas di Putra Heights

'Tunggu pihak atasan untuk tahu tempat tinggal'

Pelajar terkesan belum dapat meneruskan pengajian

Oleh Rafhanah Hazirah Ramlin
bhnews@bh.com.my

Subang Jaya: "Buku, komputer riba, kad matriks, semua habis terbakar. Sekarang kami hanya tunggu arahan pihak atasan untuk tahu nasib tempat tinggal kami."

Itu luahan Nur Liyana Izzati Jasni, 19, pelajar dari Kolej UNIKOP yang terkesan dalam insiden letupan paip gas Selasa lalu.

Letupan yang berlaku kira-kira 50 meter dari kediamannya di Kampung Tanjungan Baru itu memusnahkan rumah keluarganya, menyebabkan dia kehilangan semua keperluan pembelajarannya.

Liyana berkata, dia sudah ber-

ada di pusat pemindahan sementara (PPS) selama lima hari dan belum menghadiri kelas kerana menunggu penempatan semula.

"Esok (hari ini) sepatutnya mula kelas, tetapi saya tidak masuk juga dan sudah maklumkan pihak universiti.

"Saya tinggal di rumah ketika kejadian dan memang tidak sempat menyelamatkan apa-apa barang," katanya.

Penduduk Taman Harmoni yang juga pelajar Universiti Tenaga Nasional (UNITEN), Mohd Hasif Haris Huzaini, 21, bersyukur rumah berserta harta benda mereka masih terselamat daripada insiden itu.

"Kereta sahaja yang 'cair'. Itulah kenderaan yang saya gunakan untuk ulang-alik ke universiti.

"Esok (hari ini) pula ada pemeriksaan pertengahan semester kerana cuti Aidilfitri sudah berakhir.

"Nasib baik pihak universiti memberi peluang kepada kami untuk mengambil peperiksaan



Nur Liyana Izzati



Mohd Hasif Haris



Ahmad Darwisy

kemudian," katanya.

Terima bantuan

Sementara itu, penuntut Universiti Kebangsaan Malaysia (UKM), Ahmad Darwisy Zulkafli, bersyukur pihak universiti turut menyalurkan sumbangan kepada pelajar yang terkesan, termasuk dirinya.

Mereka ditemui media ketika Kementerian Pendidikan Tinggi (KPT) melalui Yayasan Perkasa Siswa mengumpulkan data untuk pemberian bantuan RM2,000

kepada semua pelajar yang terkesan dalam insiden letupan paip gas di Putra Heights itu.

Sehingga tengah hari semalam, pihak yayasan sudah menerima hampir 85 borang maklumat awal pelajar dari seluruh institusi pengajian tinggi (IPT) di bawah KPT.

Bantuan peringkat KPT disalurkan selepas proses mendapatkan maklumat pelajar terbabit seperti status pengajian dan nombor akaun bank diselesaikan.